

## СВЕТЛАЯ ПАСХАЛЬНАЯ ЗАУТРЕНЯ.

О часе утреннем параклисирх, взем благословение у настоятеля, исходит и ударяет в великое, и клеплет довольно. И, вшед во храм, вжигает свечи вся и кандила: устрояет же сосуды два со углем горящим и влагает в них фимиама много благовоннаго, и поставляет един сосуд среди церкви, другой же во святом алтаре, яко да исполнится церковь вся благовония. Таже настоятель, вшед во святой алтарь со иереи и диаконы, облачатся в весь светлейший сан. И раздает свечи братии, и возьмет Честный Крест: кадило же возьмет диакон: иерей же святое Евангелие, ин иерей образ Воскресения Христова: и ставятся лицом на запад. И затворят врата церковная, яже к западу. Исходит настоятель со иереи в притвор, северными дверьми, предыдущим пред ним диаконом со двема свечами, и оба лика поюще стихиру, глас 6:

Воскресение Твое, Христе Спасе, \* Ангели поют на небесех, \* и нас на земли сподоби \* чистым сердцем Тебе славить.

Таже ударяют во вся кампаны и тяжкая, и клепают довольно. И, вшедше в притвор, станут со Евангелием и со образом, лицом на запад, якоже указася прежде. Таже настоятель возьмет у диакона кадило в правую руку, Крест же в левую и кадит образы и клиросы, и братию по обычаю. Диакону же предносящу пред ним свещу горящу. Братия же вси стоят держаще свечи своя, со вниманием молящиеся в себе, и благодаряще нас ради пострадавшего и воскресшего Христа Бога нашего. По скончании же каждения, приходит настоятель пред великия врата церкви и покадит диакона, предстоящего ему со свещею. Тогда взем кадило диакон от руку настоятеля, и покадит самого настоятеля. И паки восприим настоятель кадило, став пред церковными дверьми, зря на восток, и назнаменает великия врата церкви, (затвореная суца), кадилом крестообразно, трижды, держа в левой руке Честный Крест, и светильником стоящим со обою страну. **И велегласно возгласит:**

Слава Святей, и Единосущней, и Животворящей, и Неразделимей  
Троице: всегда, ныне и присно, и во веки веков.

И нам отвечающим: Аминь.

Начинает настоятель, с прочими служители, велегласно настоящий тропарь, во глас 5-й:

Христос воскрес из мертвых, смертию смерть поправ, и сущим во гробех живот даровав.

И мы тойжде поем подобне, со сладкопением. Поется же сей тропарь трижды от настоятеля, и трижды от нас.

Таже настоятель глаголет стихи:

Первый стих: Да воскреснет Бог, и расточатся врази Его, и да бежат от Лица Его ненавидящие Его.

Христос воскрес: единожды.

Второй стих: Яко исчезает дым, да исчезнут, яко тает воск от лица огня.

Христос воскрес: единожды.

Третий стих: Тако да погибнут грешницы от Лица Божия, а праведницы да возвеселятся.

Христос воскрес: единожды.

Четвертый стих: Сей день, егоже сотвори Господь, возрадуемся и возвеселимся вонь.

Христос воскрес: единожды.

Слава: Христос воскрес: единожды.

И ныне: Христос воскрес: единожды.

Таже настоятель поет вышшим гласом: Христос воскрес из мертвых, смертию смерть поправ. И отверзает врата.

Входит настоятель с Честным Крестом, предыдущим ему со двема лампадами, и братьям поющим: И сущим во гробех живот даровав. Таже ударяют во вся кампаны и клеплют довольно, три звона.

Вшед же настоятель со иереи во святыи алтарь. И диакон глаголет ектению великую: Миром Господу помолимся. Возглас: Яко подобает Тебе всякая слава:

И начинает предстоятель канон, творение господина Иоанна Дамаскина. Глас 1. Ирмос: Воскресения день: Ирмосы на 4: и тропари на 12, с припевы: Христос воскрес из мертвых. И паки последи кийждо лик ирмос. Последи же на сходе катавасна, ирмос тойже: Воскресения день: И по нем Христос воскрес: весь трижды. Творит же начало канона на куюждо песнь всегда предстоятель, десной или левой стране случившейся начати. И кадит в начале канона святыя иконы и оба лики, и братию по чину. И по коейждо песни бывает ектения малая вне олтаря, якоже рехом, во святыи сей день. Возглас внутрь олтаря от иереа. По 1-й песни поет десная страна. По 3-й же поет левая. Сие поем и по прочих песнях.

### Канон, глас 1-й:

#### Песнь 1.

**Ирмос:** Воскресения день, \* просветимся, людие: \* Пасха, Господня Пасха! \* От смерти бо к жизни \* и от земли к небеси \* Христос Бог нас преведе, \* победную поющия.

Припев: Христос воскрес из мертвых.

Очистим чувства \* и узрим неприступным светом Воскресения \* Христа блистающая, \* и радуйтесь рекуща, \* ясно да услышим, \* победную ноюще.

Небеса убо достойно да веселятся, \* земля же да радуется, \* да празднует же мир, \* видимый же весь и невидимый: \* Христос бо воста, веселие вечное.

**Катавасия: Воскресения день ..., Христос воскрес: [трижды]**

Таже ектения, и возглас: Яко Твоя держава, и Твое есть Царство, и сила, и слава Отца, и Сына, и Святого Духа, ныне и присно, и во веки веков.

### Песнь 3.

**Ирмос: Приидите, пиво пием новое, \* не от камени неплодна чудодеемое, \* но нетления источник, \* из гроба одождивша Христа, \* в Немже утверждаемся.**

Ныне вся исполнишася света, \* небо же и земля, и преисподняя: \* да празднует убо вся тварь \* востание Христово, \* в немже утверждается.

Вчера спогребохся Тебе, Христе, \* совостаю днесь воскресну Тебе, \* сраспинахся Тебе вчера. \* Сам мя прослави, Спасе, \* во Царствии Твоем.

**Катавасия: Приидите, пиво пием новое ..., Христос воскрес: [трижды]**

Таже ектения, и возглас: Яко Ты еси Бог наш, и Тебе славу возсылаем, Отцу, и Сыну, и Святому Духу, ныне и присно, и во веки веков.

### Ипакои, глас 4-й:

Предварившия утро яже о Марии, \* и обретшия камень отвален от гроба, \* слышаху от Ангела: во свете присносущнем Сущаго \* с мертвыми что ищете, яко человека? \* Видите гробныя пелены, \* тецыте и миру проповедите, \* яко воста Господь, умертвивый смерть, \* яко есть Сын Бога, спасающего род человеческий.

### Песнь 4.

**Ирмос: На Божественной стражи \* богоглаголивый Аввакум \* да станет с нами и покажет \* светоносна Ангела, \* ясно глаголюща: \* днесь спасение миру, \* яко воскрес Христос, \* яко Всесилен.**

Мужеский убо пол, \* яко разверзый девственную утробу, \* явился Христос: \* яко человек же, \* Агнец наречеся: \* непорочен же, \* яко невкусен скверны, \* наша Пасха, \* и яко Бог истинен \* совершен речеся.

Яко единоклетный агнец, \* благословенный нам венец Христос, \* волею за всех заклан бысть, \* Пасха чистительная, \* и паки из гроба красное \* правды нам возсия Солнце.

Богоотец убо Давид, \* пред санным ковчегом \* скакаше играя, \* людие же Божии святии, \* образов событие зряще, \* веселимся Божественне, \* яко воскрес Христос, \* яко Всесилен.

**Катавасия: На Божественной стражи ..., Христос воскрес: [трижды]**

Ектенна, и возглас: Яко Благ и Человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

### Песнь 5.

**Ирмос: Утренюем утреннюю глубокую \* и вместо мира песнь принесем Владыце, \* и Христа узрим правды Солнце, \* всем жизнь возсияющая.**

Безмерное Твое благоутробие, \* адовыми узами содержимии зряще, \* к свету идяшу, Христе, \* веселыми ногами, \* Пасху хваляще вечную.

Приступим, священоснии, \* исходящу Христу из гроба, яко жениху, \* и спразднуем любопытными чинми \* Пасху Божию спасительную.

**Катавасия: Утренюем утреннюю глубокую ...,**

Ектенна, и возглас: Яко святися и прославися пречестное и великолепое имя Твое, Отца, и Сына, и Святого Духа, ныне и присно, и во веки веков.

### Песнь 6.

**Ирмос: Снизшел еси в преисподняя земли \* и сокрушил еси верей вечныя, \* содержащая связанныя, Христе, \* и тридневен, яко от кита Иона, \* воскресл еси от гроба.**

Сохранив цела знамения, Христе, \* воскресл еси от гроба, \* ключи Девы не вредивый в рождестве Твоем, \* и отверзл еси нам райския двери.

Спасе мой, \* живое же и нежертвенное зачатие, \* яко Бог Сам Себе \* волею привел Отцу, \* совоскресил еси всеродного Адама, \* воскрес от гроба.

**Катавасия: Снизшел еси ..., Христос воскрес: [трижды]**

Ектенна, и возглас: Ты бо еси Царь мира и Спас душ наших, и Тебе славу возсылаем, Отцу, и Сыну, и Святому Духу, ныне и присно, и во веки веков.

### Таже кондак, глас 8-й:

Аще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтеся, \* и Твоим апостолом мир даруй, падшим подай воскресение.

**Икос: Е**же прежде солнца Солнце зашедшее иногда во гроб, предвариша ко утру, ищущия яко дне мироносицы девы, и друга ко друзей вопияху: о другини, приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся, якоже

волсви, и поклонимся, и принесем мира яко дары, не в пеленах, но в плащанице обвитому, и плачим, и возопиим: о Владыко, востани, падшим подай воскресение.

**Синаксарий, во святую и великую Неделю Пасхи. Стихи:**

**Христос спед к борьбе адове Един.**

**Многия взем победы корысти, взыде.**

**Во** святую и великую Неделю Пасхи самое живоносное Воскресение празднуем Господа Бога и Спаса нашего Иисуса Христа, еже убо и Пасху именуем: яже еврейскою беседою преведение толкуется. Той бо есть день, воньже Бог в начале мир от небытия приведе. В той день израильтеския люди, сквозе Чермное море провед, от фараоновых искищает рук. В той паки, с небесе сошед, во утробу Девы вселися: и ныне из адовых сокровищ человеческое естество все исхитив, на небеса возведе и к древнему достоянию приведе нетления. Обаче, сошед во ад, не всех воскреси, но елицы веровати Ему изволиша: души же яже от века святых нуждею держимыя от ада свободи, и всем даде на небеса взыти. Сего ради, радуящися, преестественне со светлостию Воскресение празднуем, радость образующе, еюже естество наше милосердия ради милости Божия обогатися: такожде и вражды разрушение, и еже с Богом соединение и с самими Ангелы показующе, обычное содеваем целование. Господне же Воскресение бысть сице: воином стрегущим гроб, о полунощи трус бывает: сошед бо Ангел, камень отвалает от дверей гроба. Стражие же ужасающися бегают. И прихождение zde женам бывает в субботу позде, якоже от полсубботныя нощи. И первее убо Воскресение Божии Матери познаваемо бывает прямо сидящей гроба с Магдалиною, якоже глаголет Матфей. Но да не сомнило бы ся Воскресение, за еже к Матери присвоения, евангелисти глаголют: первее является Магдалини Марии, она же и на камени Ангела виде, и приникши паки сущия внутрь зрит, иже убо и Господне Воскресение возвещают: воста бо, глаголют, несть zde: се место, идеже положиша Его. Течет убо сия слышавши и к теплейшим от ученик приходит, к Петру и Иоанну, и Воскресение сим благовествует. Возвращающися же ей с другою Мариною, сrete я Христос, глаголя: радуйтесь. Подобаше бо первое слышавшему роду: в печалех родиши чада, тому прежде и радость внушити. Сия же любовию побеждаемая приступают и пречистыма ногама Его касаются, опаснейше разумети хотяше. Апостола же ко гробу притекоста, Иоанн убо приник точию во гроб, отыде. Петр же внутрь входит и испытнейше зрит, плащанице же касается и судареви. Паки же Магдалина приходит ко гробу о утрени со другими женами, виденная уверити хотяши опасно. У внешних же стоящи рыдаше, внутрь же гроба приникши, зрит два Ангела блистающа светлостию, и аки претяща ей, и глаголюща: жено, что плачещи и кого ищещи? Иисуса ищите Назарянина распятого: воста, несть zde. И абие восташа пристрашни, видевше

Господа. Темже она, обращшиися вспять, видит Христа стояща, вертоградаря же Его быти мнящи (зане в вертограде гроб бысть), глаголет: Господин аще Ты еси взял Его, рцы ми, где еси положил Его и аз возму Его. Паки же Спас, ко Ангелом помаав, глаголет к Магдалини: Марие. Она же сладкий и обычный Христов ощутивши глас, прикоснутися Ему хотяше. Он же глаголет: не прикасайся Мне, не убо вздох ко Отцу Моему, якоже ты помышляеши, еще человека Мя быти нещующи: иди же к братии Моей и рцы им, елика же видела еси и слышала. И сие убо Магдалина делает. Свитающу же дню паки у гроба с прочими бывает. Сущии же со Иоанною и Саломиею, возсиявшу солнцу приидоша. И просто реши, различно еже на гроб жен прихождение бысть, в нихже бе и Богородица. Та бо есть, юже Иосиеву глаголет Марию Евангелие. Иосифов же бе сын сей Иосий. В неизвестном убо есть, в кий час воскрес Господь: нецыи убо в первое куроглашение глаголют, друзии же егда трус бысть, и различно друзии. Сим же тако бывшим, се неции от кустодии дошедше, возвестиша архиереем содеявшаяся. Они же сребрениками их умздивше, повинуют реши: яко ученицы Его, пришедше нощию, украдоша Его. В вечер настоящего дне, учеником во едино собранным страха ради иудейскаго и дверем твердо заключенным, входит к ним Иисус, яко в нетленном телеси бе, и мир обычно сим благовествует. Они же, Сего видевши, премного возрадовашася, и дуновением совершеннейшее Всесвятаго Духа действие приемлют. Како же тридневное Воскресение Господне? Веждь сице: вечер четвертка и день пятка, тако бо нощенство еврее исчисляют, день един. Пятка паки нощь и суббота вся, другое нощенство, се день второй. Паки субботня нощь и недели день, от части бо начала все приемлется, третие нощенство: се день третий. Или сице: В третий час пятка распят бысть Христос. Таже от шестаго часа до девятаго тьма бысть, сие нощь ми разумей, се от третияго даже до девятаго едино нощенство. Таже паки по тьме, день и нощь пятка, се два нощенства. День субботы и нощь ея паки, се три нощенства, по евангелисту глаголющему: свитающу во едину от суббот. Аще ли в третий обещав облагодетельствова нас Спас, скорейше содела благодейство и тако благодать, и слава Ему во веки веков. Аминь.

#### Таже глаголем:

**В**оскресение Христово видевши, \* поклонимся Святому Господу Иисусу, \* Единому Безгрешному. \* Кресту Твоему покланяемся, Христе, \* и святое Воскресение Твое поем и славим: \* Ты бо еси Бог наш, \* разве Тебе иного не знаем, \* имя Твое именуем. \* Приидите, вси вернии, \* поклонимся святому Христову Воскресению: \* се бо прииде Крестом радость всему миру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши. [Трижды.]

Воскрес Иисус от гроба, \* якоже прорече, \* даде нам живот вечный \* и велию милость. [Трижды.]

### Песнь 7.

**Ирмос:** Отроки от печи избавивый, \* быв Человек, \* страждет яко смертен, \* и страстию смертное \* в нетления облачит благолепие, \* Един благословен \* отцев Бог и препрославлен.

**Ж**ены с миры богомудрыя \* в след Тебе течаху: \* Егоже, яко мертва, со слезами искаху, \* поклонившася радующияся Живому Богу, \* и Пасху тайную \* Твоим, Христе, \* учеником благовестиша.

**С**мерти празднуем умерщвление, \* адово разрушение, \* иного жития, вечного, начало, \* и играюще поем Виновного, \* Единого благословенного \* отцев Бога \* и препрославленного.

**Я**ко воистинну священная \* и всепразднственная сия спасительная ночь, \* и светозарная, \* светоносного дне, \* востания сущи провозвестница: \* в нейже безлетный Свет \* из гроба плоти всем возсия.

**Катавасия:** Отроки от печи избавивый ..., Христос воскрес: [трижды]

Ектения, и возглас: Буди держава Царствия Твоего благословенна и препрославленна, Отца, и Сына, и Святого Духа, ныне и присно, и во веки веков.

### Песнь 8.

**Ирмос:** Сей нареченный и святой день, \* Един суббот Царь и Господь, \* праздников праздник \* и торжество есть торжеств: \* воньже благословим Христа во веки.

**П**риидите, новаго винограда рождения, \* божественного веселия, \* в нарочитом дни Воскресения \* Царствия Христова приобщимся, \* поюще Его \* яко Бога во веки.

**В**озведи окрест очи твои, Сионе, и виждь: \* се бо приидоша к тебе, \* яко богосветлая светила, \* от запада и севера, и моря, \* и востока чада твоя, \* в тебе благословящая Христа во веки.

**Троицен:** Отче Вседержителю, и Слове, и Душе, \* трети соединяемое во Ипостасех Естество, \* Пресущественне и Пребожественне, \* в Тя крестихомся и Тя благословим во вся веки.

**Катавасия:** Сей нареченный и святой ..., Христос воскрес: [трижды]

Таже ектения, и возглас: Яко благословися имя Твое, и прославися Царство Твое, Отца, и Сына, и Святого Духа, ныне и присно, и во веки веков.

### Песнь 9.

**Стих:** Величит душа моя \* воскресшаго тридневно от гроба \* Христа  
Жизнодавца.

**Ирмос:** Светися, светися, \* новый Иерусалиме: \* слава бо Господня \* на  
тебе возсия, \* ликуй ныне \* и веселися, Сионе. \* Ты же, Чистая,  
красуйся, Богородице, \* о востании Рождества Твоего.

**Стих:** Величит душа моя \* волею страдавша и погребена, \* и  
воскресшаго тридневно от гроба.

Светися, светися ...,

**Стих:** Христос новая Пасха, \* Жертва живая, \* Агнец Божий, \* взявляй  
грехи мира.

**О** Божественнаго, о любезнаго, \* о сладчайшаго Твоего гласа! \* С нами бо  
неложно \* обещался еси быти \* до скончания века, Христе: \* Егоже, вернии, \*  
утверждение надежды имуще, радуемся.

**Стих:** Днесь всяка тварь веселится и радуется: \* яко Христос воскрес \* и  
ад пленися.

**О** Божественнаго, о любезнаго ...,

**Стих:** Величит душа моя \* Троицпостаснаго и Нераздельнаго Божества  
державу.

**О** Пасха велия и священнейшая, Христе! \* О мудросте и Слове Божий, и  
сило! \* Подавай нам истее Тебе причащатися \* в не вечернем дни Царствия  
Твоего.

**Стих:** Радуйся, Дево, радуйся, \* радуйся, Благословенная, \* радуйся,  
Препрославленная: \* Твой бо Сын воскрес \* тридневен от гроба.

**О** Пасха велия и священнейшая, Христе! \* О мудросте и Слове Божий, и  
сило! \* Подавай нам истее Тебе причащатися \* в не вечернем дни Царствия  
Твоего.

**Стих:** Ангел вопияше \* благодатней, \* Чистая Дево радуйся, \* и паки  
реку, радуйся: \* Твой Сын воскрес тридневен от гроба, \* и мертвыя \*  
воздвигнувый, \* людие веселитесь.

**Ирмос:** Светися, светися, \* новый Иерусалиме: \* слава бо Господня \* на  
тебе возсия, \* ликуй ныне \* и веселися, Сионе. \* Ты же, Чистая,  
красуйся, Богородице, \* о востании Рождества Твоего.

**И поет лик:** Христос воскрес: [трижды]

**Ектения, и возглас:** Яко Тя хвалят вся силы небесныя, Отца, и Сына, и  
Святаго Духа, и Тебе славу возсылают, ныне и присно, и во веки веков.

**Ексапостиларий.** Самогласен:

**П**лотию уснув, \* яко мертв. \* Царю и Господи, \* тридневен воскресл еси, \* Адама воздвиг от тли \* и упразднив смерть: \* Пасха нетления, \* мира спасение. [Трижды.]

На хвалитех, Всякое дыхание: на глас 1. Поставим стихи 4, и поем стихиры воскресны, глас 1-й:

**Стих:** Хвалите Его на силах Его, хвалите Его по множеству величества Его.

**П**оем Твою, Христе, \* спасительную страсть \* и славим Твое Воскресение.

**Стих:** Хвалите Его во гласе трубнем, хвалите Его во псалтири и гуслех.

**К**рест претерпевый и смерть упразднивый, \* и воскресый из мертвых, \* умири нашу жизнь, Господи, \* яко Един Всесилен.

**Стих:** Хвалите Его в тимпане и лице, хвалите Его во струнах и органе.

**А**да пленивый и человека воскресивый \* Воскресением Твоим, Христе, \* сподоби ны чистым сердцем Тебе пети и славить.

**Стих:** Хвалите Его в кимвалех dobroгласных, хвалите Его в кимвалех восклицания, всякое дыхание да хвалит Господа.

**Б**оголепное Твое снисхождение славяще, \* поем Тя, Христе: \* родился еси от Девы и неразлучен был еси от Отца: \* пострадал еси яко человек \* и волею претерпел еси Крест, \* воскресл еси от гроба, \* яко от чертога произшед, \* да спасеши мир, \* Господи, слава Тебе.

Таже совокупльшеся оба лика, поют стихиры Пасхи. Глас 5-й:

**Стих:** Да воскреснет Бог и расточатся врази Его.

**П**асха священная нам днесь показася: \* Пасха нова святая: \* Пасха таинственная: \* Пасха всечестная: \* Пасха Христос Избавитель: \* Пасха непорочная: \* Пасха великая: \* Пасха верных: \* Пасха, двери райския нам отверзающая: \* Пасха, \* всех освящающая верных.

**Стих:** Яко исчезает дым, да исчезнут.

**П**риидите от видения, \* жены благовестницы, \* и Сиону рцыте: \* прими от нас радости благовещения \* Воскресения Христова: \* красуйся, ликуй \* и радуйся, Иерусалиме, \* Царя Христа узрев из гроба, \* яко жениха происходяща.

**Стих:** Тако да погибнут грешницы от Лица Божия, а праведницы да возвеселятся.

**М**ироносицы жены, \* утру глубоку \* предсташа гробу Живодавца, \* обретоша Ангела \* на камени сядяща, \* и той, провещав им, \* сие глаголаше: \* что ищите Живаго с мертвыми? \* Что плачете Нетленного во тли? \* Шедше, \* проповедите учеником Его.

**Стих:** Сей день, егоже сотвори Господь, возрадуемся и возвеселимся в онь.

**Пасха** красная, \* Пасха, Господня Пасха! \* Пасха всечестная нам возсия. \* Пасха! \* Радостию друг друга обьемем. \* О Пасха! \* Избавление скорби, \* ибо из гроба днесь, \* яко от чертога, \* возсияв Христос, \* жены радости исполни, глаголя: \* проповедите апостолом.

**Слава, и ныне, глас 5-й:**

**Воскресения** день, \* и просветимся торжеством, \* и друг друга обьемем. \* Рцем: братие, \* и ненавидящим нас \* простим вся Воскресением \* и тако возопиим: \* **Христос** **воскресе** из мертвых, **смертию** **смерть** поправ и **сущим** во гробех **живот** даровав.

**Таже** **Христос** **воскресе:** трижды. И поем сие многажды, дондеже целуют братия друг друга.

**Целование** же настоятеля с прочими иереи и диаконы во святом алтаре бывает сице: **Глаголет** **приходяй:** **Христос** **воскресе**, **оному** же **отвещающу:** **Воистину** **воскресе**. **Посем** **взем** **настоятель** **Честный** **Крест** и **станет** **вне** **пред** **святыми** **царскими** **дверьми**. **Такожде** и  **вси** **священники**, **елико** **их** **есть**, и **диаконы**, **вземше** **кийждо** **их** **святое** **Евангелие**, и **честные** **иконы**, **по** **чину** **своему:** и **станут** **все** **рядом**, **от** **десныя** **страны** **настоятеля**. И **приходят** **прежде** **честнейшии** **церковницы** и **старцы**, **един** **по** **единому**, и **мало** **преклоняются** **пред** **настоятелем** и **целуют** **кийждо** **их** **Честный** **Крест** и **святое** **Евангелие**, **егоже** **держит** **иерей**, и **прочии** **образы**. **Таже** и **самого** **настоятеля** **во** **уста** **целуют**, **глаголюще:** **Христос** **воскресе**. **Оному** же **отвещающу:** **Воистину** **воскресе**. **По** **тому** же **образу** и **иереев** **целуют**, и **сами** **между** **собою** **по** **чину** **своему**. И **ставятся** **от** **иереев** **по** **десной** **стране** **рядом**. **Таже** **по** **них** и **миряне** **также** **целование** **творят**. **Работницы** же **монастырстии** **в** **томже** **чину** **да** **станут** и **друг** **друга** **целующе**. **Бывает** же **посреди** **во** **всех** **веле** **молчание**. **По** **целовании** же **чтется** **Огласительное** **слово** **Златоустаго** **от** **настоятеля** **или** **екклесиарха:** **не** **сидим** же **на** **сицевом** **чтении**, **но** **стояще** **слушаем** **все**.

**Иже** **во** **святых** **отца** **нашего** **Иоанна**, **Архиепископа** **Константинопольскаго**, **Златоустаго**, **слово** **Огласительное** **во** **святый** и **светоносный** **день** **преславнаго** и **спасительнаго** **Христа** **Бога** **нашего** **Воскресения**.

**Аще** **кто** **благочестив** и **боголюбив**, **да** **насладится** **сего** **доброго** и **светлаго** **торжества**. **Аще** **кто** **раб** **благоразумный**, **да** **внидет**, **радуясь**, **в** **радость** **Господа** **своего**. **Аще** **кто** **потрудится** **постясь**, **да** **восприимет** **ныне** **динарий**. **Аще** **кто** **от** **перваго** **часа** **делал** **есть**, **да** **приимет** **днесь** **праведный** **долг**. **Аще** **кто** **по** **третьем** **часе** **прииде**, **благодаря** **да** **празднует**. **Аще** **кто** **по** **шестом** **часе** **достиже**, **ничтоже** **да** **сумнится**, **ибо** **ничимже** **отщетевається**. **Аще** **кто** **лишися** и **девятаго** **часа**, **да**

приступит, ничтоже сумняся, ничтоже бояся. Аще кто точию достиже и во единонадесятый час, да не устрашится замедления: любочестив бо Сый Владыка, приемлет последняго якоже и перваго: упокоевает в единонадесятый час пришедшаго, якоже делавшаго от перваго часа. И последняго милует, и первому угождает, и оному дает, и сему дарствует, и дела приемлет, и намерение целует, и деяние почитает, и предложение хвалит. Темже убо видите вси в радость Господа своего: и первии и вторици, мзду примите. Богатии и убозии, друг со другом ликуйте. Воздержницы и ленивии, день почитите. Постившиися и непостившиися, возвеселитесь днесь. Трапеза исполнена, насладитесь вси. Телец упитанный, никтоже да изыдет алчай, вси насладитесь пира веры: вси воспримите богатство благодати. Никтоже да рыдает убожества, явися бо общее Царство. Никтоже да плачет прегрешений, прощение бо от гроба возсия. Никтоже да убоится смерти, свободи бо нас Спасова смерть. Угаси ю, Иже от нея держимый, плени ада, Сошедый во ад. Огорчи его вкусивша плоти Его. И сие предприемый Исаия возопи: ад, глаголет, огорчися, срет Тя доле: огорчися, ибо упразднися: огорчися, ибо поруган бысть: огорчися, ибо умертвися: огорчися, ибо низложися: огорчися, ибо связася. Прият тело, и Богу приразися: прият землю, и срет небо: прият еже видяше, и впаде во еже не видяше. Где твое, смерти, жало? Где твоя, аде, победа? Воскресе Христос, и ты низвергся еси. Воскресе Христос, и падоша демони. Воскресе Христос, и радуются Ангели. Воскресе Христос, и жизнь жительствует. Воскресе Христос, и мертвый ни един во гробе. Христос бо, востав от мертвых, Начаток усопших бысть. Тому слава и держава во веки веков. Аминь.

**Таже глаголется тропарь святаго. Глас 8-й:**

**У**ст твоих якоже светлость огня возсиявши благодать, вселенную просвети: не сребролюбия мирови сокровища сниска, высоту нам смиренномудрия показа, но твоими словесы наказуя, отче Иоанне Златоусте, моли Слова, Христа Бога, спастися душам нашим.

**Посем диакон глаголет ектении: Помилуй нас, Боже: и Исполним утреннюю молитву нашу Господеву.**

**И по возгласе, диакон: Премудрость. Мы же: Благослови. Настоятель: Сый** благословен Христос Бог наш, всегда, ныне и присно, и во веки веков. **И мы: Аминь. Утверди, Боже: Посем настоятель, держа Крест, вместо: Слава Тебе, Христе Боже: поет: Христос воскрес из мертвых, смертию смерть поправ. И мы поем: И сущим во гробех живот даровав. И абие настоятель глаголет отпуст: Христос воскресый из мертвых, смертию смерть поправый и сущим во гробех живот даровавый: истинный Бог наш, молитвами Пречистыя Своея Матере и всех святых помилует и спасет нас, яко Благ и Человеколюбец. Таже, Крест возвышая, глаголет: Христос воскрес. Трижды. Мы же отвечаем: Воистину воскрес. Трижды. Таже поем конечное: Христос воскрес: трижды, весь**

тропарь. И по нем пением кончим: И нам дарова живот вечный, покланяемся  
Его тридневному Воскресению. Посем многолетны, и целуем Честный Крест,  
держимый в руку настоятеля.

## О ЧАСЕХ СЯТЫЯ ПАСХИ И ВСЕЯ СЯТАЯ СЕДИЦЫ.

Подобает ведати, яко от сего дне сятая и великия Недели Пасхи даже до субботы, часы сие поются.

Наченшу иерею: **Благословен Бог наш: Лик: Аминь.** Христос воскрес из мертвых, смертию смерть поправ, и сущим во гробех живот даровав. [трижды].

**Таже глаголем трижды:**

**В**оскресение Христово видевше, \* поклонимся Святому Господу Иисусу, \* Единому Безгрешному. \* Кресту Твоему покланяемся, Христе, \* и святое Воскресение Твое поем и славим: \* Ты бо еси Бог наш, \* разве Тебе иного не знаем, \* имя Твое именуем. \* Приидите, вси вернии, \* поклонимся святому Христову Воскресению: \* се бо прииде Крестом радость всему миру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши. [Трижды.]

**Таже ипакои, глас 4-й, единости:**

**П**редварившия утро яже о Марии, \* и обретшия камень отвален от гроба, \* слышаху от Ангела: во свете присносущнем Сущаго \* с мертвыми что ищете, яко человека? \* Видите гробныя пелены, \* тецете и миру проповедите, \* яко воста Господь, умертвивый смерть, \* яко есть Сын Бога, спасающаго род человеческий.

**Таже кондак, глас 8-й, единости:**

**А**ще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтеся, \* и Твоим апостолом мир даруй, падшим подаяй воскресение.

**Таже и сей тропарь единости:**

**В**о гробе плотски, во аде же с душею яко Бог, \* в раи же с разбойником, и на Престоле был еси Христе, со Отцем и Духом, \* вся исполняяй Неописанный.

**Слава:**

**Я**ко Живоносец, яко рая краснейший, \* воистинну и чертога всякаго царскаго показася светлейший, Христе, гроб Твой, \* источник нашего воскресения.

**И ныне, Богородичен:**

**В**ышняго освященное Божественное селение, радуйся. Тобою бо дадеся радость, Богородице, зовущим: благословенна Ты в женах еси, Всенепорочная Владычице.

**Таже Господи, помилуй, 40. Слава, и ныне: Честнейшую Херувим: Именем Господним благослови, отче. Иерей: Молитвами святых отец наших: Мы же речем: Аминь. И паки глаголем подобне: Христос воскрес: трижды. Слава, и ныне: Господи, помилуй. Трижды. Благослови. И отпуст часа.**

## ПОСЛЕДОВАНИЕ ЛИТУРГИИ, БЫВАЕТ ПОРАНУ.

Наченшу диакону: Благослови владыко. Настоятелю же возгласившу: Благословено Царство Отца, и Сына, и Святаго Духа, ныне и присно, и во веки веков. И мы: Аминь. Настоятель поет с прочими служители во святом олтаре: Христос воскрес из мертвых, смертию смерть поправ, и сущим во гробех живот даровав. Трижды. И лики тойжде, трижды.

Настоятель глаголет припевы: 1-й. Да воскреснет Бог: Лик: Христос воскрес: единожды. 2-й. Яко исчезает дым: Христос воскрес: единожды. 3-й. Тако да погибнут грешницы: Христос воскрес: единожды. 4-й. Сей день: Христос воскрес: единожды. Слава: Христос воскрес: единожды. И ныне: Христос воскрес: единожды. Таже настоятель поет вышшим гласом: Христос воскрес из мертвых, смертию смерть поправ. Мы же: И сущим во гробех живот даровав.

Посем глаголет диакон ектению великую.

По ектении же и по возгласе

Антифон 1, псалом 65, глас 2-й:

Стих 1: Воскликните Господеву вся земля.

Припев: Молитвами Богородицы, Спасе спаси нас.

И другой лик тойжде стих: Воскликните Господеву вся земля, пойте же имени Его, дадите славу хвале Его.

Молитвами Богородицы, Спасе спаси нас.

Стих 2: Рцыте Богу: коль страшна дела Твоя, во множестве силы Твоя солжут Тебе врази Твои.

Молитвами Богородицы, Спасе спаси нас.

Стих 3: Вся земля да поклонится Тебе, и поет Тебе, да поет же имени Твоему Вышний.

Молитвами Богородицы, Спасе спаси нас.

Слава, и ныне: Купно оба лика вышшим гласом:

Молитвами Богородицы, Спасе спаси нас.

Таже, ектенна малая.

Антифон второй, псалом 66, глас тойже.

Стих 1: Боже ущедри ны и благослови ны.

Припев: Спаси ны Сыне Божий, воскресый из мертвых, поюция Ти: Аллилуиа. единожды.

Другая страна, тойже стих: Боже, ущедрн ны, и благослови ны, просвети  
лице Твое на ны, и помилуй ны.

Спаси ны Сыне Божий:

Стих 2: Да познаем на земли путь Твой, во всех языцех спасение Твое.

Спаси ны Сыне Божий:

Стих 3: Да исповедятся Тебе людие Боже, да исповедятся Тебе людие  
вси.

Спаси ны Сыне Божий:

Слава, и ныне: вкупе два лика: Единородный Сыне:

Таже, ектения.

Антифон 3-й, псалом 67, глас 5-й:

Стих 1: Да воскреснет Бог, и расточатся врази Его.

Тропарь: Христос воскрес из мертвых:

Стих: Да воскреснет Бог, и расточатся врази Его, и да бежат от лица Его  
ненавидящии Его.

Христос воскрес:

Стих 2: Яко исчезает дым, да исчезнут, яко тает воск от лица огня.

Христос воскрес:

Стих 3: Тако да погибнут грешницы от лица Божия, а праведницы да  
возвеселятся, да возрадуются пред Богом.

Христос воскрес:

И бывает вход. И возглашает диакон, аще есть, аще же ни, перей:

Премудрость, прости.

Входное: В церквах благословите Бога, Господа от источник  
Израилевых.

Тропарь: Христос воскрес:

Слава:

Предварившия утро яже о Марии, \* и обретшия камень отвален от гроба, \*  
слышаху от Ангела: во свете присносущнем Сущаго \* с мертвыми что ищете,  
яко человека? \* Видите гробныя пелены, \* тецйте и миру проповедите, \* яко  
воста Господь, умертвивый смерть, \* яко есть Сын Бога, спасающаго род  
человеческий.

И ныне: кондак, глас 8-й:

Аще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруй, падшим подай воскресение.

Вместо же Трисвятаго: Елицы во Христа крестистесь, \* во Христа облекостесь: \* аллилуа.

Подобает ведати, яко сие начало Литургии, и антифоны, и Елицы во Христа крестистесь: поем во всю седмицу Светлую, даже до Недели новья: такожде и причастный.

Прокимен, глас 8-й:

Прокимен: Сей день егоже сотвори Господь, возрадуемся и возвеселимся вонь.

Стих: Исповедайтесь Господеви, яко благ, яко в век милость Его.

Апостол, Деяний чтение, зачало 1. [Деян. 1, 1 – 8.]

Первое убо слово сотворих о всех, о Феофиле, яже начат Иисус творити же и учити. Даже до дне, воньже, заповедав Апостолом Духом Святым, ихже избра, вознесся. Пред нимиже и постави Себе жива по страдании Своем, во мнозех [истинных] знамениях, деньми чотыредесятьми являясь им, и глаголя яже о Царствии Божии: С нимиже и ядый, повеле им от Иерусалима не отлучатися, но ждати обетования Отча, еже слышасте от Мене: яко Иоанн убо крестил есть водою, вы же имате креститися Духом Святым, не по мнозех сих днех. Они же убо сошедшеся, вопрошаху Его, глаголюще: Господи, аще в лето сие устрояеши царствие Израилево? Рече же к ним: несть ваше разумети времена и лета, яже Отец положи во Своей власти: Но примете силу, нашедшу Святому Духу на вы, и будете Ми свидетели во Иерусалиме же и во всей Иудеи и Самарии, и даже до последних земли.

Аллилуа, глас 4: Ты воскрес ущедриши Сиона.

Стих: Господь с Небесе на землю призре.

Евангелие от Иоанна, зачало 1. [Ин. 1, 1 – 17.]

В начале бе Слово, и Слово бе к Богу, и Бог бе Слово. Сей бе искони к Богу. Вся Тем быша, и без Него ничтоже бысть, еже бысть. В Том живот бе, и живот бе свет человеком. И свет во тьме светится, и тьма его не объят. Бысть человек послан от Бога, имя ему Иоанн. Сей прииде во свидетельство, да свидетельствует о Свете, да вси веру имут Ему. Не бе той свет, но да свидетельствует о Свете. Бе Свет истинный, Иже просвещает всякаго человека грядущаго в мир. В мире бе, и мир Тем бысть, и мир Его не позна. Во своя прииде, и свои Его не прияша. Елицы же прияша Его, даде им область чадом

Божиим быти, верующим во имя Его. Иже не от крове, ни от похоти плотския, ни от похоти мужеския, но от Бога родишася. И Слово плоть бысть, и вселися в ны, и видехом славу Его, славу яко Единороднаго от Отца, исполнь благодати и истины. Иоанн свидетельствует о Нем и воззва, глаголя: Сей бе, Егоже рех, Иже по мне Грядый, предо мною бысть, яко первое мене бе. И от исполнения Его мы вси прияхом, и благодать воз благодать: Яко закон Моисеом дан бысть, благодать же и истина Иисус Христом бысть.

Времени же приспевшу чтения святаго Евангелиа, начальный диакон, хотяй Евангелие чести, глаголет: Благослови владыко благовестителя: Таже настоятель глаголет: Бог молитвами святаго славнаго: и прочая, якоже указася в литургии. И исходит диакон, и на обычном месте прямо царских врат, на восток лицом станет, настоятелю прежде возгласившу пред престолом: Премудрость прости услышим святаго Евангелиа. Тоже и вси иереи, елицы суть служащии, по сих же и диаконы глаголют, на различных местах ставше, от святаго престола, и до западных врат церковных, един по единому. Посреди же всех стоит архидиакон, и чтут вси по настоятели, един по единому по статиям, якоже настоятель расположит. И предначинает настоятель: От Иоанна святаго Евангелиа чтение. Прочии тоже. Настоятель: Вонмем. Прочии тоже. Настоятель стоя пред престолом на восток лицом, чтет: В начале бе Слово: и прочая. Прочии тоже. И на всяком возгласе, или статии Евангелиа, ударяют в церкви по единощи в кандию. Параклисирх же вне церкви в великое било, и в великий кампан: на последнем же возгласе ударяют во вся кампаны, и в великое било, и бывает по чину Божественная Литургия Златоустаго.

Вместо же Достойно: поем:

**Ирмос:** Ангел вопияше \* благодатней, \* Чистая Дево радуйся, \* и паки реку, радуйся: \* Твой Сын воскресе тридневен от гроба, \* и мертвыя \* воздвигнувый, \* людие веселитесь.

**Таже ирмос:** Светися, светися, новый Иерусалиме: \* слава бо Господня \* на тебе возсия, \* ликуй ныне \* и веселися, Сионе. \* Ты же, Чистая, \* красуйся, Богородице, \* о востании Рождества Твоего.

Причастный: Тело Христово примите, источника безсмертнаго вкусите, аллилуа. [трижды]

Егда же настоятель глаголет: Со страхом Божиим и верою приступите. Мы вместо, Благословен грядый во имя Господне: поем: Христос воскрес: единожды. Настоятель глаголет: Спаси Боже люди Твоя: И мы: Христос воскрес: единожды. Егда же изглаголет иерей: Всегда ныне и присно: И мы: Христос воскрес: единожды. Посем ектения. Вместо же, Буди имя Господне: и вместо псалма, Благословлю Господа: поем: Христос воскрес: дванадесять, и множае: дондеже анафора от игумена раздастся. Таже настоятель, Благословение Господне на вас: Лик: Аминь. Посем настоятель вместо, Слава

Тебе Христе Боже: поет: Христос воскрес из мертвых смертию смерть поправ.  
И лик: И сущим во гробех живот даровав. Посем настоятель глаголет отпуст со  
Крестом по обычаю, якоже указася на Утрени.

Да будет же вестно и се, яко врат царских олтаря, великих же и от стран  
малых, по всем церквам во всю Светлую седмицу не затворяем и во время  
причащения.

## ПОДОБАЕТ ВЕДАТИ, КАКО ПОЕТСЯ МОЛЕБЕН НА СВЯТУЮ ПАСХУ.

Иерей глаголет: **Благословен Бог наш: И мы: Аминь.**

Таже иерей: **Христос воскрес: трижды.**

Таже, **Христос воскрес, трижды, на лики, якоже предызъявися в начале Утрени.**

**По Слава и ныне: иерей глаголет: Христос воскрес из мертвых, смертию смерть поправ.**

**Мы же: И** сущим во гробех живот даровав.

**Слава, и ныне: ипакои:**

**Предварившия утро** яже о Марии, \* и обретшия камень отвален от гроба, \* слышаху от Ангела: во свете присносущнем Сущаго \* с мертвыми что ищите, яко человека? \* Видите гробныя пелены, \* тецйте и миру проповедите, \* яко воста Господь, умертвивый смерть, \* яко есть Сын Бога, спасающаго род человеческий.

**Аще ли хоцещи приложити канон коего святаго. И глаголи прежде тропарь святаго, единожды. Слава, и ныне: Предварившия утро:**

**Посем канон Пасхи, со ирмосом на 6.**

**Припев: Христос воскрес: И святаго, аще будет, на 4.**

**Катавасия. По 3-й, и 6-й песни: Спаси от бед:**

**Спаси от бед рабы Твоя, Богородице, \* яко мы по Бозе \* к Тебе прибегаем, \* яко к нерушимей стене и Предстательству.**

**Призри благосердием, \* Всепетая Богородице, \* на мое лютое \* телесе озлобление, \* и исцели души моя болезнь.**

**По 6-й песни, кондак и икос Пасхи: Глас 8-й:**

**Аще и во гроб снишел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруй, падшим подай воскресение.**

**Икос: Е**же прежде солнца Солнце зашедшее иногда во гроб, предвариша ко утру, ищущия яко дне мироносицы девы, и друга ко друзей вопияху: о другини, приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся, якоже волсви, и поклонимся, и принесем мира яко дары, не в пеленах, но в плащанице обвитому, и плачим, и возопиим: о Владыко, востани, падшим подай воскресение.



Аще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруй, падшим подай воскресение.

Таже ектения: Помилуй нас Боже:

Посем иерей глаголет: Премудрость.

Мы же, Христос воскрес: трижды.

Таже иерей, вместо, Слава Тебе Христе Боже:

Христос воскрес из мертвых, смертию смерть поправ.

И мы: И сущим во гробех живот даровав. И отпуст со Крестом глаголет сице: Христос воскресый из мертвых: и прочая, яко предписана в конце Утрени.

Посем возглашает: Христос воскрес. трижды.

Мы же отвечаем: Воистинну воскрес. трижды.

И паки поем: Христос воскрес: трижды.

Таже, Господи помилуй, трижды, с пением.

Ведомо же буди и се, яко мяс православнии христиане к церкви не приносят, но в дом ко нерею.

**МОЛИТВА ВО ЕЖЕ БЛАГОСЛОВИТИ БРАШНА МЯС, ВО СВЯТУЮ И  
ВЕЛИКУЮ НЕДЕЛЮ ПАСХИ.**

Творит иерей: Благословен Бог наш:

Христос воскрес: трижды.

Таже: Господу помолимся. Господи помилуй.

Призри Господи Иисусе Христе Боже наш, на брашна мяс, и освяти я, якоже освятил еси овна, егоже Тебе приведе верный Авраам, и агнца, егоже Тебе Авель во всеплодие принесе: подобне и тельца упитанного, егоже жрети повелел еси сынови Твоему заблудшему, и паки к Тебе возвращшемуся: да якоже той сподобися Твоя благости насладиться, сице и освященных от Тебе, и благословенных насладимся в пищу всех нас. Ты бо еси истинная пища, и податель благих, и Тебе славу возсылаем со Безначальным Твоим Отцем, и Пресвятым, и Благим, и Животворящим Твоим Духом, ныне и присно, и во веки веков. Аминь.

## МОЛИТВА ВО ЕЖЕ БЛАГОСЛОВИТИ СЫР И ЯИЦА.

Яица же и сыр принесенныя поставляются в притворе, в церковь же отнюд не подобает вносить.

Священник же изшед глаголет: Господу помолимся. Господи помилуй.

Владыко Господи Боже наш, зиждителю и содетелю всех, благослови млеко огустившее, с нимже и яица, и нас соблюди во благодати Твоей, яко да причащающесе их, Твоих независтно подательных даров исполнимся, и неизглаголанная Твоя благодати: яко Твоя держава, и Твое есть Царство, и сила, и слава, Отца, и Сына, и Святаго Духа, ныне и присно, и во веки веков. Аминь.

Вестно же буди: яко сицевый, мяс и набелу, принос, несть пасха, ниже агнец, якоже нецыи глаголют, и приемлют, и ему со всяким говением якоже некоей святыни причащаются, но простое приношение. Не аки бо сие в жертву Богу приноситься имать, но токмо да начинающим по посте мясо и сыр ясти, от иереа предложенными молитвами в снедь благословено будет: Пасха бо Сам Христос есть и Агнец вземляй грехи мира, на олтари в безкровной Жертве, в пречистых Тайнах, честнаго Тела, и животворящая Крове Своея, от иереа Богу и Отцу приносимый, и Тому достойно причащающиися истинную ядят Пасху. И сего ради оныя приносы, яко не суть пасха, во олтарь или в церковь не достоин вносить, но вне церкви, или в притворе, молитвою благословити, по третьему правилу святых апостол глаголющих: Аще кто епископ, или пресвитер, кроме вчинения Господня о жертве, иная некая ко олтарю принесет, мед или млеко, или вместо вина сикеру, снесть оловину, или медовину, или птицы, или кая животная, или сочива, разве гроздия в лете, и елеа на свещники, и фимиама во время Литургии, да извержется. И по шестому собору, иже в Трулле, в правиле 99-м, глаголющу: И сему во Арменстей стране бывати уведехом, яко нецыи внутрь во святых олтарех уды мяс варяще, части приносят священником, жидовски разделяюще. Темже Церковь непорочну храняще, узаконихом, яко не подобает неединому же священнику различных мяс частей от приносящих приимати, но теми довольни да будут, яже приносящему возмнятся. Сицевому приношению бываему вне церкви: аще же кто сего не сотворит, да отлучится.

## ПОСЛЕДОВАНИЕ АРТОСА, В ДЕНЬ СЯТЫЯ ПАСХИ:

По отпусте Божественныя Литургии, возьму иерею образ Воскресния Христова, диакону же прииму от онаго артос царскими враты, аще во олtare будет. [В неких же обителях на аналогии, во храме на сие устроенном, купно со образом Воскресния Господня поставляется, и ко анафоре идуще целуют первое праздник, также артос.]

И диакон возьмет его из места, с панагием, и в руках несет, предыдущей лампаде, или двумя. Настоятель же и братия вся по чину своему исходят со артосом, [снестъ хлебом, просфорой всецелою на се со Крестом на ней изображенным уготованною] из церкви в трапезу, вместо псалма, Вознесу Тя Боже мой: Христос воскрес: поюще. Параклисиарху же, и прочей братии во вся звонь ударяющим.

И вшедше в трапезу ставят праздник и артос на местах их. И глаголет настоятель: Христос воскрес: трижды.

И Отче наш: Слава и ныне: Господи помилуй, трижды.

Благослови. Настоятель: Христе Боже, благослови ястие:

И прочее.

Мы же: Аминь. Седаем кийждо на месте своем, со всяким безмолвием и благоговением. И бывает утешение великое на вся. И чтение по обычаю.

По обычной трапезе востанув братия, ставят артос на трапезе, поюще: Христос воскрес: трижды.

Господи помилуй, трижды. Благослови.

Также келарь прием обычное прощение от настоятеля и братии:

Благословите мя отцы святые, и простите меня грешного.

Мы же речем: Бог да простит и благословит.

Также снем камлавхий, возгласит, вместо, Велико имя Святая Троицы: Христос воскрес, единожды.

Нам же отвечающим: Воистинну воскрес:

Тойже назнаменав крестообразно артосом, глаголет:

Поклоняемся Его тридневному воскресению:

полагает и на панагии. Потом приносит келарь артос с панагием к настоятелю, и целует артос и вся по нем братия, поюще песнь 9-ю: ирмос: Светися светися: И прочая, оба тропаря той песни.

И паки ирмос: Светися, светися: По целовании же просфоры от всех, возвратився келарь, ставит ю пред настоятелем, и речет стих:

Молитвами святых отец наших, Господи Иисусе Христе Боже наш, помилуй нас.

И мы: Аминь. И поем: Христос воскрес: трижды.

Слава: ипакои глаголем: Предварившия утро:

И ныне: кондак: Аще и во гроб: Господи помилуй, трижды. Благослови.

Настоятель: Благословен Бог милуяй, и питай нас от Своих богатых даров, Своею благодатию и человеколюбием, всегда, ныне и присно, и во веки веков.

И мы: Аминь.

Таже настоятель: Бог да простит и помилует послуживших нам.

И абие исходит из трапезы в церковь, и братия вся по чину своему, предыдущу иерею со иконою Воскресния Христова, и диакону со артосом, и клириком поющим: Христос воскрес:

Тогда паракклисиарх и прочая братия ударяют во вся звоны. Вшедшу же настоятелю и братии в церковь, иерей и диакон поставляют на своих им местех икону и артос: мы же поем: И нам дарова живот вечный: И идем в келлии своя.

Сице же возследуется целование о просфоре, яже есть артос, чрез всю седмицу святых Светлых Недели, даже до субботы.

Подобает ведати, яко аще случится брату коему отыти ко Господу в сию святую седмицу Пасхи: и о сем зри всего последования сих дней о усопших в Требнике.